

Success per la moziun da Martin Candinas

Parlament pretenda che la posta arrivia fin las 12.30

■ (sda/anr/vi) La posta sto esser sin il pli tard fin las 12.30 en tuttas stgaffas da brev. Quai pretenda il parlament ch'ha assegnà ina moziun da cusseglier naziunal Martin Candinas al cussegl federal. En autras domenas na less il cussegl dals chantuns dentant betg sa maschadar en. Il cussegl naziunal ha acceptà la primavaira gist quatter moziuns che pertutgan la posta. Trais da questas intervenziuns ha il cussegl dals chantuns refusà ier. Cun questa decisiun en quellas giu da maisa.

Cunter la veglia da la cumissiun

Cun 24 cunter 14 vuschs e duas abstenziuns ha la chombra pitschna dentant acceptà la moziun da Candinas. El pretendà che la posta arrivia mintgamai fin las 12.30 sch'i na dat en ina regiun nagina spediziun da gasettas da la damaun. La cumissiun predeberanta aveva refu-

sà la moziun. Grazia a mesiras da La Posta arrivian gasettas abunadas gia oz fin mezdi en la stgaffa da brev. Uschia saja il giavisch principal ademplì, ha argumentà Claude Janiak (ps/BL) en num da la cumissiun. Sch'il temp vegnia fixà en la lescha limiteschian ins senza necessitad il spazi d'agir da La Posta.

Plinavant èsi vegnì fatg attent che Urs Schwaller haja sincerà che La Posta sa stentia en l'avegnir dad arrivar ad uras. Ins posia sa fidar dal pled dal president dal cussegl d'administraziun damai ch'el haja sco anteriur cusseglier dals chantuns in tschert sensori per il service public.

D'in auter avis è stà Beat Rieder (pcd/VS): «Per mai sa preschenta La Posta sco concern che sa retira ord las regiuns periferas.» La Posta ageschia oz anc adina tuttina sco avant quatter onns. Entaifer las ultimas emnas haja el survegnì telefons gist or da duas vischnancas nua che La Posta veglia serrar ses uffizis. E che la posta arrivia magari pir suentermezdi en regiuns periferas na saja nagina rarità. Era da parlamentaris da la Romandia ha la moziun Candinas survegnì grond sustegn.

Romandia sustegn Candinas

Suenter ch'era la chombra pitschna ha ditg gea ier a sia moziun è Candinas vegnì interrogà gist en roda da schurnalists da la Romandia, dal Tessin e dal Grischun ed el ha stuì dar pled e fatg gist en tuttas quatter linguas naziunalas. Ch'el cuntanschia in uschè bun resultat en la chombra pitschna n'haja el betg spetgà, di Candinas a l'anr. La Posta haja fatg stentas encunter sia moziun per tema che lezza restrenschia memia fitg l'interpresa. «Uss hai jau sa chapescha plachair ch'ins vesa en il parlament che la glied vul avair ina gasetta abunada fin mezdi en la stgaffa da brev.»

Davart il sustegn dals parlamentaris da la Romandia di Candinas: «Sch'i va per il service public ha la Romandia ina gronda chapientscha ed in bun sensori. Ils parlamentaris da la Romandia èn er adina pli averts da dar tschertas directivas dal stadi anora.» Gist quai saja la sfida en connex cun La Posta. Lezza na saja betg in uffizi statal ed era betg in'interpresa spirontamain privata. Perquai stoppian ins chattar in equiliber e tscherts puncts stoppia la politica simplamain dar avant a La Posta. «Ins na po betg adina dir l'economia decida sezza», concluda il politicher grischun. «Igl è er impurtant per La Posta da vesair nua ch'el parlament metta la posta.»



Per sia moziun ha cusseglier naziunal Martin Candinas survegnì sustegn cunzunt da la Romandia.

KEYSTONE

Posta na va betg cun plazzas en l'exteriur

Avant dus onns ha La Posta fatg in project da pilot a Vietnam nua ch'ins ha laschà exequir tschertas lavurs logisticas. A medem temp han ins bajegià giu plazzas en la logistica a Cuira ed a Sion. Martin Candinas ha sinaquai inoltrà ina moziun ch'ha pretendì che plazzas da La Posta na dastgian betg vegnir spustadas en l'exteriur. Il cussegl naziunal aveva acceptà la moziun, ma la chombra pitschna l'ha refusada ier cun 22 cunter 17 vuschs ed ina abstenziun. Candinas n'è betg trumpà. Cura ch'el haja inoltrà sia moziun marschavia quest project da pilot a Vietnam. «Quest project han ins suenter franà – betg il davos pervi dal squitsch politic entras la moziun.» El haja dentant suenter tuttina tegnì ferm vi da sia moziun ed il cussegl naziunal haja uschia pudì exprimer cleramain ch'i saja da far atenziun e betg spustar plazzas existentas en l'exteriur. La Posta possia schon sa sviluppar en l'exteriur, quai dentant cun novas fatschentas. Quests signals sajan stads impurtants era per il nov schef da La Posta. «La Posta tutga tschient per tschient al pievel. Ed i n'è betg en l'interess dal pievel sche La Pposta sposta plazzas da lavur en l'exteriur.»

COMMENTARI

CLAUDIA CADRUVI / ANR

Tge stoda mulesta! Ins spetga urgentamain in pac u ina brev impurtanta e la posta arriva pir suentermezdi. U ch'ins less leger la gasetta durant solver, ma la posta la metta en stgaffa da brev pir uschè tard ch'ins na l'ha gnanca per il caffè suenter gentar sin maisa. Questa situaziun enconuschan blers mastergnants e blers lecturs en regiuns periferas.

Cun sia moziun cuntanscha Martin Candinas che la posta arriva en l'avegnir dapertut fin las 12.30 – cunzunt là nua ch'i dat nagina distribuziun da la damaun. Quai è impurtant, pertge tuts duain esser servids tuttina bain en Svizra e re-

Gasetta e posta fin gentar

tschaiver ad uras gasettas, revistas, pacs e brev. In tal servetsch na dastga betg esser dependent dal lieu nua ch'ins abitescha.

Intgins parlamentaris han cumbatì la moziun cun l'argument che Urs Schwaller sco president dal cussegl d'administraziun haja sincerà che La Posta fetschia en l'avegnir tut il pussaivel per vegnir ad uras. Schwaller saja sco anteriur cusseglier dals chantuns sensibilisà per il service public ed ins sappia sa fidar da ses pled. Ma schefs e presidents da posta vegnan e van. Bainsvelt han direzziun e management emblidà emper-mischuns d'antieriurs superiurs.

Perquai èsi necessari da fixar en la lescha u en l'ordinaziun da

tge uras che la posta ha dad esser distribuìda. I na dastga betg esser che la glied en vitgs grischuns, en vischnancas dal Giura u en valladas tessinaises è sutposta a las lunas da managers da posta u ad ideas da spargn d'in cussegl d'administrativ. La periferia na dastga betg trasora vegnir sut las rodas da la rentabilitad.

En il cussegl dals chantuns èn cunzunt era parlamentaris da la Romandia sa fatgs ferm per la moziun Candinas. La Romandia tegna ad aut il principi dal service public e na sa lascha betg impressiunar uschè svelto da la chanzun sempiterna da l'effizienzza e da la libertad economica.